



Bilten Saveza općina i gradova Federacije Bosne i Hercegovine



Godina: XXI

Datum: 08.03.2024.

Broj: 293

USLUGE SAVEZA:

• PRAVNO SAVJETOVALIŠTE:

Selma Fišek, viši saradnik za pravna pitanja
selma@sogfbih.ba

• FINANSIJSKO SAVJETOVALIŠTE

Halko Basarić, viši saradnik za finansijska
pitanja
halko@sogfbih.ba

KORISNI LINKOVI ZA FONDVE EU:

www.southeast-europe.net
www.adriaticinnovationmap.eu
www.adrioninterreg.eu
www.europa.ba
www.cbibplus.eu
www.cbc.bih-mne.org
www.srb-bih.org
www.interreg-hr-ba-me2014-2020.eu
www.programmed.eu
<https://tacso.eu/>
<https://evinfo.ba/en/>
www.balkanfund.org
<https://eacea.ec.europa.eu>
www.welcomeurope.com

ADRESA:

Musala br.5/1
71000 Sarajevo
Telefon: +387 33 216 502,
209 024, 209 120
fax: +387 33 552 810, 216 502
savez@sogfbih.ba

NAJAVA PANEL DISKUSIJE NA TEMU GARANCIJA LOKALNE AUTONOMIJE U FBiH KROZ USKLAĐENOST SA STANDARDIMA EVROPSKE POVELJE O LOKALNOJ SAMOUPRAVI

Savez općina i gradova Federacije Bosne i Hercegovine, u saradnji sa Vijećem Evrope organizira panel diskusiju na temu garancija lokalne autonomije u Federaciji Bosne i Hercegovine kroz usklađenost sa standardima Evropske povelje o lokalnoj samoupravi



SAVEZ OPĆINA I GRADOVA
FEDERACIJE BOSNE I HERCEGOVINE
Association of municipalities and cities of the FBiH

Cilj panel diskusije je otvoriti dijalog sa predstavnicima zakonodavne i izvršne vlasti u Federaciji Bosne i Hercegovine o njihovoj zakašnjoj obavezi harmonizacije zakona sa Zakonom o principima lokalne samouprave u Federaciji Bosne i Hercegovine uvažavajući poseban karakter ovog Zakona u odnosu na opće zakonodavstvo.

Održavanju panel diskusije prethodio je Izvještaj „Garancija lokalne autonomije u FBiH kroz usklađenost sa standardima Evropske povelje o lokalnoj samoupravi“ kojeg su izradili eksperti Vijeća Evrope. Izvještaj, između ostalog, predstavlja stručni odgovor na mišljenje Federalnog ministarstva pravde i stav upravne inspekcije u pogledu utvrđivanja nadležnosti za donošenje odluke o organizaciji službi jedinica lokalne samouprave i donošenja pravilnika o unutrašnjoj organizaciji službi jedinica lokalne samouprave.

Panel diskusija, između ostalog treba da pokrene proces šire rasprave sa svrhom konačnog rješenja otvorenih pitanja koja u nekim slučajevima predstavljaju prepreku za međusobno uvažavanje i saradnju organa vlasti u jedinicama lokalne samouprave, a što je prepoznao i navedeni Izvještaj.

Panel diskusija će se održati 25.04.2024. godine u Sarajevu, hotel Ibis.

Rad panel diskusije će biti sadržan kroz tri panel sesije:

Panel 1: Poseban karakter Zakona o principima lokalne samouprave u Federaciji Bosne i Hercegovine


Panel 2: Utvrđivanje i organizacija rada službi za upravu i drugih službi jedinica lokalne samouprave

Panel 3: Odnos viših nivoa vlasti prema nadležnostima i finansiranju lokalnog nivoa vlasti.

Paneli će se održavati jedan za drugim uz izlaganje uvažanih predstavnika Vijeća Evrope, zakonodavne i izvršne vlasti u Federaciji Bosne i Hercegovine, univerzitetskih profesora, istaknutih pravnika, (grado)načelnika, vijećnika, nezavisnih eksperata i drugih.

Savez očekuje prisustvo velikog broja (grado)načelnika sa područja Federacije BiH, pomoćnika (grado)načelnika, sekretara organa, predstavnika zakonodavne i izvršne vlasti sa lokalnog, kantonalnog i entitetskog nivoa, predstavnike sudske vlasti, međunarodne zajednice, akademske javnosti, kao i nevladinog sektora.

Podršku održavanju Panel diskusije pruža Vijeće Evrope, Vlada Kraljevine Švedske i Vlada Švajcarske Konfederacije.



Švicarska agencija za razvoj i saradnju SDC



JEDINICE LOKALNE SAMOUPRAVE NE PRISTAJU NA SMANJENJE PRIHODA OSTVARENOG KORIŠTENJEM POTOPLJENOG ZEMLJIŠTA

Na poziv predsjedavajućeg Predsjedništva skupštine Saveza općina i gradova FBiH g-dina Mladena Mišuruća-Ramljaka, u Kiseljaku je 01.02.2024. godine održan konsultativni sastanak zainteresiranih jedinica lokalne samouprave vezano za Nacrt Zakona o izmjenama i dopunama Zakona o izdvajanju i usmjeravanju dijela prihoda preduzeća ostvarenog korištenjem hidroakumulacijskih objekata. Sastanku su prisustvovali sljedeće jedinice lokalne samouprave: Grad Lukavac, Grad Livno, Grad Živinice, Grad Konjic, Općina Prozor-Rama, Općina Tomislavgrad i Općina Jablanica.

Predloženim izmjenama i dopunama ovog Zakona izmjenjen je jedinični iznos naknade po proizvedenom kilowatsatu električne energije, također je izmjenjen status općina i gradova koji su korisnici naknade od hidroakumulacija koje imaju prvenstveno namjenu snabdjevanja vodom industrije i stanovništva, te se predloženim izmjenama neće vršiti usklađivanje visine naknade.

Nakon sastanka, usvojeni su sljedeći zaključci koji su dostavljeni Federalnom ministarstvu prostornog uređenja:

- Savez općina i gradova FBiH insistira da se prilikom izmjena i dopuna predmetnog Zakona zadrži dostignuti nivo prihoda jedinica lokalne samouprave, a što će biti omogućeno povećanjem jediničnog iznosa naknade sa 0,01 KM na 0,013 KM.
- Imajući u vidu da Regulatorna agencija za energiju, u skladu sa Zakonom o električnoj energiji FBiH („Službene novine FBiH“ broj: 60/23) nema ovlasti utvrđivati cijenu električne energije, potrebno je izvršiti usklađivanje jediničnog iznosa naknade sa drugim objektivnim kriterijumom, na čemu insistiraju jedinice lokalne samouprave.
- Ovim izmjenama potrebno je omogućiti obračun i naplatu naknade svih površina koje služe za hidroakumulacije, uključujući hidroakumulacijske objekte i ostale površine. Također, traži se brisanje odredbe iz Nacrtu Zakona o izmjenama i dopunama Zakona o izdvajanju i usmjeravanju dijela prihoda preduzeća ostvarenog korištenjem hidroakumulacijskih objekata kojom su iz obračuna i naplate isključene jedinice lokalne samouprave koje ostvaruju prihode iz akumulacija koje imaju prvenstveno namjenu snabdjevanja vodom industrije i stanovništva.



Sa konsultativnog sastanka održanog u Kiseljaku, 1.02.2024.

Savez insistira da se prilikom izmjena i dopuna predmetnog Zakona zadrži dostignuti nivo prihoda jedinica lokalne samouprave

ODRŽANA DESETA SJEDNICA PREDSJEDNIŠTVA SKUPŠTINE SAVEZA OPĆINA I GRADOVA FEDERACIJE BOSNE I HERCEGOVINE

Deseta sjednica Predsjedništva Skupštine Saveza općina i gradova Federacije Bosne i Hercegovine, održana je u utorak 27.02.2024. godine u Tešnju, u sali Općinskog vijeća.

Predsjedništvo je informisano o aktivnostima radnih tijela Saveza kroz rad komisija, kao i o presudi Ustavnog suda FBiH u vezi sa Zakonom o računovodstvu i reviziji FBiH koja ima pozitivan ishod za jedinice lokalne samouprave, te o aktivnostima Saveza u vezi sa Zakonom o električnoj energiji u FBiH.

Predsjedništvo je upoznato sa Izvještajem sa Prve vanredne sjednice Komisije za lokalnu samoupravu Predstavničkog doma Parlamenta FBiH vezano za Zahtjev Saveza za hitno djelovanje u cilju osiguranja poštivanja principa vladavine prava i pravne sigurnosti, principa Evropske povelje o lokalnoj samoupravi i Zakona o principima lokalne samouprave u Federaciji BiH, kao i o planiranoj Panel diskusiji na ovu temu koju će Savez, u saradnji sa Vijećem Evrope, organizirati krajem aprila u Sarajevu. Navedena panel diskusija će ukazati na zakašniju obavezu viših nivoa vlasti po pitanju harmonizacije zakonskih propisa sa Evropskom poveljom o lokalnoj samoupravi i sa Zakonom o principima lokalne samouprave u FBiH.



Sa sjednice Predsjedništva održane u Tešnju, 27.02.2024.

Predsjedništvo Saveza je usvojilo zaključak da se prema Vladi i Parlamentu FBiH uputi inicijativa za donošenje Zakona o zaštiti i dobrobiti životinja u FBiH u cilju rješavanja ove problematike.

„U okviru Panel diskusije, raspravljat će se o odnosu vlasti u Federaciji Bosne i Hercegovine spram jedinica lokalne samouprave. Osim toga, na Desetoj sjednici Predsjedništva dotakli smo se Zakona o principima lokalne samouprave u FBiH i njegove usklađenosti s drugim zakonima“, kazao je Mladen Mišurić - Ramljak, predsjednik Predsjedništva Skupštine Saveza općina i gradova FBiH i načelnik općine Kiseljak.

Predsjednik Mišurić - Ramljak napomenuo je kako su predstavnici Saveza održali sastanak sa ministrom pravde Federacije Bosne i Hercegovine a razgovaralo se o koliziji Zakona o organizaciji organa uprave u FBiH i Zakona o principima lokalne samouprave u FBiH u pogledu donošenja pravilnika o unutrašnjem ustrojstvu i sistematizaciji radnih mjesta organa uprave i drugih službi.

„Zakon o organizaciji organa uprave u FBiH kaže da to donosi općinsko vijeće a Zakon o principima lokalne samouprave u FBiH navodi kako to donosi načelnik odnosno gradonačelnik. Raspravljali smo i o izmjenama i dopunama Zakona o naknadama za potopljeno zemljište u saradnji sa Federalnim ministrom prostornog uređenja gdje smo postigli kompromisno rješenje za donošenje novog Zakona a tiče se jedinica lokalne samouprave kojima je potopljeno zemljište, odnosno hidroakumulacija za proizvodnju električne energije“, pojašnjava predsjednik Mišurić - Ramljak.

Predsjedavajući Skupštine Saveza općina i gradova FBiH i načelnik općine Tešanj Suad Huskić, je naveo kako su se na Desetoj sjednici Predsjedništva Saveza razmatrale veoma bitne teme za rad jedinica lokalne samouprave, od električne energije do vodnih resursa i građevinskog zemljišta.

„Savez općina i gradova FBiH je ozbiljna organizacija u kojem sudjeluju lokalne zajednice te ima svoja radna tijela. Lokalne zajednice imaju potrebu da insistiraju na boljem položaju kod viših nivoa vlasti“, istakao je Huskić.

Predsjedništvo Saveza je također podržalo zaključke sa 1. Vanredne sjednice Komisije za lokalnu samoupravu Predstavničkog doma Parlamenta Federacije Bosne i Hercegovine kojima se traži od Vlade FBiH da pokrene aktivnosti na usklađivanju člana 49. stav 4., člana 50. stav 3. i člana 52. stav 1. tačke (3) i (4) Zakona o organizaciji organa uprave u Federaciji Bosne i Hercegovine sa odredbama člana 15. Zakona o principima lokalne samouprave u Federaciji Bosne i Hercegovine, kao i da formira radnu grupu sa zadatkom utvrđivanja liste zakona sa federalnog nivoa koje je potrebno usaglasiti sa Zakonom o principima lokalne samouprave u Federaciji Bosne i Hercegovine.

ODRŽANA SJEDNICA KOMISIJE ZA USTAVNA I ZAKONODAVNA PITANJA SAVEZA

Dana 14.02.2024. godine u Hotelu „Art“ u Sarajevu, održana je sjednica Komisije za ustavna i zakonodavna pitanja Saveza. Sjednici su prisustvovali predsjednik Komisije Azem Huseinbašić i Elvira Imširović Bolić, kao i Elida Čulov, Ivana Kljajić i Stanka Rašić putem zoom linka.

Sjednici Komisije je prisustvovala i direktorica Saveza općina i gradova Federacije BiH, Vesna Travljanin, kao i Aida Kurbegović i Halko Basarić, ispred Stručne službe Saveza.

Na sjednici Komisije, razmatrano je pitanje aktualizacije starih zaključaka Predsjedništva Skupštine Saveza, a vezano za Zakon o zaštiti i dobrobiti životinja BiH. Zakon o zaštiti i dobrobiti životinja („Sl.glasnik BiH“, br.25/2009 i 9/2018) je donesen krajem 2009. godine i od tada, pa do danas, javljaju se problemi sa njegovom primjenom sa aspekta jedinica lokalne samouprave. Ogromna finansijska sredstva izdvajaju se za skloništa za pse, kao i za naknadu štete prema trećim licima, bez bilo kakve podrške sa viših nivoa vlast. Usvojen je zaključak da se podržava aktualizacija starih zaključaka sa Predsjedništva Skupštine Saveza i to: precizno definirati izvore finansiranja u Zakonu, Kantoni preuzeti odgovornost i nadležnost izgradnje skloništa za životinje, izmijeniti Zakon u smislu definiranja broja dana u azilu, prije mogućnosti eutaniziranja, donijeti propise koji će definirati obaveze i odgovornosti vlasnika životinja jer je uzrok problema čovjek, vlasnik životinje – najodgovorniji akter, edukacija svih zainteresiranih strana: građana i institucija.

Na sjednici između ostalog je razmatrano i pitanje Analize na kome je upisana državna imovina u zemljišnim knjigama, a što je podržalo Predsjedništvo Skupštine Saveza na svojoj Petoj sjednici, održanoj 19.10.2022. godine u Hadžićima. Podržan je Zaključak da se angažuje stručno lice, konsultant, koji će uz podršku Stručne službe Saveza i podataka koji su oni prikupili, uraditi stručnu Analizu na kome je upisana državna imovina u zemljišnim knjigama.

Komisija je donijela zaključak o izradi stručne Analize upisa državne imovine u zemljišnim knjigama, kao i zaključak o izmjeni Zakona o zaštiti i dobrobiti životinja

POTPISANA PISMA SPORAZUMA O REALIZACIJI NAGRADNIH PROJEKATA U OKVIRU PROJEKTA „JAČANJE ULOGE MJESNIH ZAJEDNICA U BIH“

Ceremonija potpisivanja pisama sporazuma o realizaciji nagradnih projekata u okviru projekta „Jačanje uloge mjesnih zajednica u BiH“ održana je 14.02.2024. godine u prostorijama Saveza opština i gradova Republike Srpske u Bijeljini. Riječ je o zajedničkoj ceremoniji koju su organizovali Razvojni program Ujedinjenih nacija u BiH (UNDP), Savez opština i gradova Republike Srpske i Savez općina i gradova Federacije Bosne i Hercegovine.

Svečanosti potpisivanja pisama sporazuma prisustvovali su predstavnici četiri odabrane jedinice lokalne samouprave (Travnik, Kalesija, Han Pijesak i Srbac).

Pismo sporazuma o realizaciji nagradnog projekta potpisali su Alija Džafić, u ime Općine Kalesija i Sifet Melić u ime Općine Travnik. Izabrani projekat u Općini Kalesija je „Rekonstrukcija prostorija mjesne zajednice Kalesija Centar“ dok je u Općini Travnik projekat „Izgradnja igrališta 'Bazen' Turbe i pratećih sadržaja“.

Prijedlozi projekata ove dvije jedinice lokalne samouprave, odabrani od strane Saveza općina i gradova Federacije Bosne i Hercegovine i UNDP-a, će od strane UNDP-a dobiti sredstva u iznosu od po 25.000,00 KM po jedinici lokalne samouprave za realizaciju predloženih projekata.

Projekat jačanja uloge mjesnih zajednica je zajednički projekat Vlade Švicarske i Švedske, kojeg provodi UNDP. Druga faza projekta se provodi u ukupno 41 jedinici lokalne samouprave i 199 mjesnih zajednica širom BiH i traje do kraja 2024. godine. Cilj druge faze projekta jeste poboljšanje kvalitete života i veći angažman građana u procesima donošenja odluka te povećanje rodne ravnopravnosti kroz sistemske promjene i ciljane intervencije na lokalnom nivou.



Sa ceremonije potpisivanja sporazuma, Bijeljina 14.02.2024.

FEDERALNA VLADA UTVRDILA PRIJEDLOG ZAKONA O GRAĐEVINSKOM ZEMLJIŠTU U FBiH

Vlada Federacije BiH je, na 29. sjednici održanoj 6.03.2024. godine, na prijedlog Federalne uprave za geodetske i imovinsko-pravne poslove utvrdila Prijedlog zakona o građevinskom zemljištu u Federaciji BiH koji će biti upućen u Parlament Federacije BiH na usvajanje.

Ovim zakonom se, pojašnjava predlagač, uređuje oblast građevinskog zemljišta, u skladu sa "novim" stvarnim pravom, odnosno načelima i pravilima postavljenim kroz Zakon o stvarnim pravima, što je utvrđena zakonska obaveza. Kroz osam poglavlja Prijedloga ovog zakona normira se pojam i definicija građevinskog zemljišta, uređuje raspolaganje i upis građevinskog zemljišta u javne registre, način određivanja građevinskog zemljišta. Također se reguliše sticanje i zaštita prava na građevinskom zemljištu, kao i prestanak svojstva javnog dobra i uređenje građevinskog zemljišta. Propisuju se naknade koje se plaćaju prilikom korištenja građevinskog zemljišta, definišu prava i obaveze jedinica lokalne samouprave i vlasnika jednih spram drugih kada je u pitanju planska izgradnja i privođenje građevinskog zemljišta trajnoj namjeni, te se rješava nadzor nad provođenjem zakona, utvrđuju prekršajne odredbe, a uređuje se i primjena propisa u prelaznom periodu i stupanje zakona na snagu.

Predlagač u obrazloženju zakona, između ostalog, navodi da se ovim zakonskim propisom kao građevinsko zemljište definiše sve ono zemljište koje je važećim prostorno-planskim dokumentima predviđeno za izgradnju i za to zemljište važi pravni režim koji se reguliše ovim prijedlogom zakona. U skladu s "novim" stvarnim pravom, načelom jednovrsnosti vlasništva i jedinstva nekretnine u ovom prijedlogu zakona se ne pravi razlika između gradskog građevinskog zemljišta (koje je nekada bilo u isključivo društvenom vlasništvu) i ostalog građevinskog zemljišta (koje je moglo biti i u privatnom vlasništvu), nego se sve građevinsko zemljište posmatra kao cjelina i ima isti status.



U ovom prijedlogu zakona se ne pravi razlika između gradskog građevinskog zemljišta i ostalog građevinskog zemljišta nego se sve građevinsko zemljište posmatra kao cjelina i ima isti status.

U razlozima za donošenje ovog zakonskog propisa predlagač, između ostalog, podsjeća da Zakonom o stvarnim pravima utvrđeno da će se propisi o građevinskom zemljištu usaglasiti sa odredbama tog zakona u roku od tri mjeseca od dana početka njegove primjene.

U razlozima za donošenje ovog zakonskog propisa predlagač, između ostalog, podsjeća da od 2014. godine počinje primjena Zakon o stvarnim pravima kojim se nakon dugo vremena oblast stvarnih prava vraća srednjeevropskoj tradiciji, uvodi načelo jednovrsnosti vlasništva, jednakosti svih titulara, odnosno nosilaca prava vlasništva i načelo jedinstva nekretnine, te se propisuje opća vlasnička transformacija nekadašnjeg društvenog vlasništva odnosno njegovih derivata (pravo upravljanja, raspolaganja, korištenja).

Predlagač također, između ostalog, pojašnjava da je članom 371. stav 2. Zakona o stvarnim pravima utvrđeno da će se propisi o građevinskom zemljištu usaglasiti sa odredbama tog zakona u roku od tri mjeseca od dana početka njegove primjene, tako da jedan od razloga za donošenje ovog novog zakona o građevinskom zemljištu u FBiH proizilazi iz odredbe općeg propisa u oblasti stvarnih prava.

Predlagač ističe i da oblast građevinskog zemljišta treba urediti posebnim propisom, i to ne samo zato što je to obaveza Zakona o stvarnim pravima, nego prije svega zato što to zahtijeva sadašnji društveno-ekonomski okvir, a posebno interes razvoja urbanih naselja i infrastrukture.

ODRŽANA RADIONICA O LOBIRANJU I ZAGOVARANJU ZA RAZVOJ REGIONALNIH KAPACITETA ZA USLUGE VODOSNABDIJEVANJA I ODVODNJE U JEDINICAMA LOKALNE SAMOUPRAVE



Sa radionice o lobiranju i zagovaranju, Sarajevo 27-29.02.2024.

Od 27. do 29. februara 2024. godine u Sarajevu je održana radionica o zagovaranju i lobiranju u okviru projekta "Regionalan mreža za razvoj kapaciteta za usluge vodosnabdijevanja, odvodnje i prečišćavanja otpadnih voda na Zapadnom Balkanu".

Radionicu o zagovaranju i lobiranju su vodili treneri Zoran Bogdanovski i Zvonko Naumoski koji su naveli praktične primjere za predstavnike koji dolaze iz jedinica lokalne samouprave.

Na edukaciji je ukazano na važnost jačanja kapaciteta nevladinih organizacija u cilju uticaja na javnu politiku kroz kampanje zagovaranja, zakonodavno lobiranje i izgradnju koalicija. Istaknuta je važnost razumijevanja zagovaranja i njegovog uticaja na odluke javnih politika.

Ukazano je na važnost izgradnje vještina zagovaranja promjene politike, pronalaženja područja konsenzusa i izgradnje na tom konsenzusu. Učesnici su na radionici imali priliku da steknu znanja i vještine kako uticati na javnu politiku kroz kampanje zagovaranja, zakonodavno lobiranje i izgradnju koalicija. Osim toga, navedene su najbitnije strategije i taktike u poduzimanju aktivnosti javnog zagovaranja.

Za kraj je istaknuto kako zagovaranje podrazumijeva odbranu određenog spornog pitanja ili problema.

Radionici su prisustvovali predstavnici Saveza općina i gradova Federacije Bosne i Hercegovine, Saveza opština i gradova Republike Srpske, Udruženja/Udruga preduzeća/poduzeća komunalne privrede/gospodarstva u Federaciji Bosne i Hercegovine, Aquasan mreža u BiH, Vodovoda Nikšića, Sekretarijata za komunalne poslove Grada Podgorice i drugi.


SMART CITY - BILTEN BR. 6

Izradu Biltene je podržao projekat „Pametni gradovi – ka digitalnoj transformaciji gradova u BiH“.

Projekat se realizuje kroz razvojno partnerstvo sa kompanijama Lanaco d.o.o., DVC Solutions d.o.o. u okviru developePPP.de programa koji implementira Deutsche Gesellschaft für Internationale Zusammenarbeit (GIZ) GmbH u ime Saveznog ministarstva za ekonomsku suradnju/saradnju i razvoj SR Njemačke (BMZ), u saradnji sa udruženjem BiT Alijansa.

Bilten možete preuzeti na sljedećem linku:

<http://www.sogfbih.ba/dokumenti/smart-city-bilten-br-6>



JAVNI POZIV ZA ODABIR JEDINICA LOKALNE SAMOUPRAVE ZA PRIPREMU AKCIONOG PLANA ENERGETSKI ODRŽIVOG RAZVOJA I KLIMATSKIH PROMJENA (SECAP)

Predmet Javnog poziva je prikupljanje prijava za pripremu Akcionog plana energetske održivosti i klimatskih promjena (SECAP) u jedinicama lokalne samouprave (JLS) u Bosni i Hercegovini, koje do momenta raspisivanja Javnog poziva nemaju prihvaćen SECAP od strane Sporazuma gradonačelnika za klimu i energiju.

Ovaj Javni poziv je otvoren za JLS koje izraze volju da postanu članice Sporazuma gradonačelnika za klimu i energiju, kao i za JLS koje su članice Sporazuma gradonačelnika za klimu i energiju ali nemaju prihvaćen SECAP od strane Sporazuma gradonačelnika za klimu i energiju. Shodno tome, one JLS koje budu odabrane za izradu SECAP-a biće u obavezi da zvanično pristupe Sporazumu gradonačelnika za klimu i energiju, tokom procesa izrade SECAP-a.

Rok za dostavljanje prijava je 16. mart 2024. godine.

Zainteresovani aplikanti mogu dobiti dodatne informacije i objašnjenja postavljanjem pitanja na e-mail: crp@crp.org.ba pri čemu u naslovu poruke (Subject) treba navesti „Green Kick, izrada SECAP-a – poziv za prijave JLS”, najkasnije do 8. marta 2024. godine.

Tekst javnog poziva i obrazac za prijavu možete naći na web stranici Saveza <https://www.sogfbih.ba/vijest/javni-poziv-za-odabir-jedinica-lokalne-samouprave-za-pripremu-akcionog-plana-energetski>

Supported by:



on the basis of a decision
by the German Bundestag



Gledajte Savez općina i gradova
Federacije Bosne i Hercegovine na



Poštovani čitaoci,

putem ovog biltena pružamo Vam mogućnost da se informišete o aktivnostima Saveza, o bitnim dešavanjima u općinama i gradovima, aktivnostima naših partnera, institucija vlasti, kao i o razmjeni najboljih iskustava i praksi.

Na ovaj način pružamo informacije o održanim sjednicama organa i tijela Saveza, konferencijama, seminarima, radionicama, okruglim stolovima, javnim raspravama, projektnim aktivnostima i sl.

Ukoliko želite da se prijavite za primanje ovog biltena možete to učiniti tako što ćete poslati e-mail na: dino@sogfbih.ba; ili putem popunjavanja forme na našoj web stranici.

Molimo vas da informacije o našem biltenu proslijedite svima u vašoj i susjednim JLS i drugim zainteresiranim.

Ukoliko želite da objavite neke od vaših novosti, iskoristite bilten Saveza koji je brz i efikasan način komuniciranja.

Sa zadovoljstvom očekujemo vaše komentare, sugestije ili primjedbe.